

四庫全書

史部

欽定四庫全書

平定準噶爾方略正編卷三十

乾隆二十一年秋七月丁亥

宣示薩喇爾罪狀

上諭大學士曰班第鄂容安同薩喇爾駐守伊犁當
阿逆叛亂之時班第鄂容安捐軀殉節而薩喇爾
獨自脫逃及拏解來京朕親加審訊據稱彼時以
賊衆四集恐力不能支是以帶兵逃出冀圖再舉

等語朕因其所言情節尚應質對暫行監禁今巴
寧阿栢琨等到京質訊之下言頗相符但供拔去
所賜孔雀翎而逃是其偷生負國已屬顯然然在
滿漢世受國恩之臣而臨難苟免自當明正典刑
伊係厄魯特新附之人不足責以死綏大義今班
第鄂容安靈櫬已到朕親臨祭奠優予卹典靈櫬
俱令進城即著旺扎爾帶同薩喇爾前往班第鄂
容安柩前將逆黨阿巴噶斯克什木先行馘耳祭

莫令薩喇爾在旁看視夫人孰無死使薩喇爾亦
能如二臣之決計就義則今日哀榮之典自當一
體同受而乃顛越至此使伊稍有人心能無愧乎
其阿巴噶斯等俟阿逆拏獲到日一併正法以彰
國憲薩喇爾著永遠拘禁將此傳諭中外知之

戊子

命優卹伊犁陣亡官員

上諭大學士曰去歲伊犁擾亂時跟隨將軍大臣之

滿洲蒙古侍衛官員喀爾喀王公台吉等其奮勇
殺賊及自盡復生後經陸續旋歸者朕已悉加恩
賞晉秩陞用至陣亡自盡之滿洲蒙古侍衛官員
喀爾喀台吉等甚屬可憫著俟兆惠查明奏到之
日交該部照陣亡例議奏賞給世職以示優卹
命土爾扈特使臣入

覲

上諭軍機大臣曰前因土爾扈特遣人前往西藏特

派麒麟保帶領同行今據奏稱已於七月初旬起程赴藏計其回時朕已駐蹕熱河著傳諭麒麟保即帶領土爾扈特使臣由張家口外前赴熱河入覲

己丑

諭擒拏青滾雜卜事宜

上諭軍機大臣曰據納穆扎爾奏青滾雜卜遣人至烏里雅蘇台煽惑喀爾喀等情形可疑等語青滾

雜卜居心詭詐深可痛恨著舒明等詳細察看此
時若已露背叛情形即會同親王成衮扎布得親
扎卜等相機擒拏若尚未生事端止宜留心防範
俟哈達哈撤兵同時再行辦理青滾雜卜游牧與
唐努山甚近其或在游牧或向唐努山至烏梁海
皆未可定並著傳諭哈達哈臨期確訪或先派兵
豫阻去路再行擒拏毋得任其脫逃再貝勒策登
扎卜呈稱不能辦理臺務必係聽青滾雜卜指使

著一併拏解來京其臺站事務即速交親王成衮
扎布接續辦理毋致貽悞至哈達哈等自哈薩克
回時馬匹不免疲瘦舒明等即豫選馬匹善為牧
放俟哈達哈將到即解往接續以增兵力並著學
士阿桂速赴軍營協同辦理

命以青滾雜卜罪狀傳

諭喀爾喀王公等

上諭喀爾喀王公等曰青滾雜卜原係獲罪斥革之

人因其尚知奮勇仍加恩承襲貝勒並授為喀爾喀副將軍上年從征伊犁加恩封授郡王稍有人心自當感激圖報孰意其深負厚恩實出情理之外伊前同阿逆進兵時聽從指使將巴特瑪車凌之弟諾爾布丹津私行帶回將軍大臣參奏阿逆罪狀竟敢潛為洩漏嗣後追擒阿逆退縮阻撓奏請兩路出師五萬方可追緝種種悖謬乖張不可枚舉彼時本應即行正法朕因念及伊祖博貝舊

日勞績特加寬宥以觀後效是以此次辦理烏梁
海復授為叅贊予以自新之路伊至烏梁海並未
拏獲鄂木布郭勒卓輝等即撤兵而回雖尚有將
軍哈達哈等領兵在彼伊即退回無關輕重但既
為叅贊並不奏請諭旨亦不咨報將軍帶兵擅回
律以軍法罪不容誅且捏為種種浮言煽惑衆聽
其心實不可問試思辦理準噶爾一事原為喀爾
喀經理久長之計是以命將興師以期一勞永逸

然選派喀爾喀官兵俱經賞給錢糧米石派辦牲
隻何次不給發價值而青滾雜卜乃謂喀爾喀以
連年用兵為累是誠何心至於軍行賞罰乃國家
憲典所必行達木巴扎卜係管理都爾伯特游牧
人員縱令巴朗脫逃諱匿不報額林沁多爾濟監
視阿逆來京明知其叛跡已露袖手旁觀致令免
脫二人情罪斷難姑容然猶念伊等祖父不忍加
之顯戮令其自盡此而曲為寬縱國法何在而青

滾雜卜乃謂喀爾喀係青吉斯汗後裔向不治罪
此語舛謬更甚如朕宗室中有犯刑章者朕又何
嘗廢法耶至於稍知奮勉如巴扎爾什第桑寨多
爾濟及策布登扎布等則俱優封顯秩賜予便蕃
青滾雜卜寧不聞之耶已交軍營大臣等拏解青
滾雜卜來京治罪本應除其屬衆削其封爵朕始
終眷念伊祖不忍泯其勞績所有貝勒封爵仍施
恩准令額林沁之子旺布多爾濟承襲朕辦理庶

政一秉至公有功者予之厚恩犯法者斷無姑貸
將此曉諭衆喀爾喀王公等知之

諭親王成袞扎布擒拏和托輝特青滾雜卜事宜

上諭軍機大臣曰親王成袞扎布世受國恩深知感

激伊聞和托輝特青滾雜卜種種狂悖即移咨納

穆扎爾轉奏能念伊父額駙素日篤誠力圖報効

深堪嘉予著賞荷包一對以示優眷和托輝特青

滾雜卜去歲進兵時迎合阿逆種種不法今又擅

自撤兵復托言衆喀爾喀以用兵為累遲其詭詐
喀爾喀等深受國家厚恩斷不為伊煽惑已降旨
詳悉曉諭青滾雜卜應即拏解來京治罪朕已諭
舒明阿蘭泰等會同親王成衮扎布得親扎卜等
審機辦理青滾雜卜乃無足重輕之人第喀爾喀
舊臣僕中有似此敗類不可不申明國憲成衮扎
布等務宜留心防範毋得洩漏此時如應速為擒
治即會同衆喀爾喀王公等領兵擒拏否則仍遵

前旨俟哈達哈等回時再行辦理

叅贊大臣富德疏奏會同將軍哈達哈等進兵
事宜

富德奏言臣遣瑠綽爾圖扎什保前往確探兩
路大兵信息至濟爾瑪台地方遇定邊左副將
軍哈達哈等大兵已渡額爾齊斯河即令臣等
由阿勒圭前進會齊臣等即帶兵迅速前往俟
遇哈達哈時會議將兵丁分隊進發務使聲息

相通協力擒拏逆賊再從前脫逃之唐古忒至散秩大臣烏魯木游牧內搶掠已為烏魯木所殺又擒獲與唐古忒同逃之索諾木達爾扎之子蒙固勒訥默庫二人係額林沁之女所生並喇嘛羅卜占三濟亦係同額林沁行走之人現在派員解至軍營奏入報

聞

壬辰

諭都爾伯特王公台吉等分年入

覲事宜

上諭軍機大臣曰策凌策凌烏巴什等自歸降以來
感朕厚恩奮勉効力今移至額爾齊斯舊游牧地
方遣使請定輪班朝覲之期具見誠悃伊等遣使
請安毋庸立定期限每年原應遣人來京領俸若
於遣使請安之時支領俸餉事屬兩便至輪班朝
覲一事都爾伯特部落著分作三班每年輪值一

班來京入覲即於明年為始應何處盟長帶領王
公台吉等來京交該盟長等酌量定議具奏至伊
等遷回舊游牧後自需馬匹應用著施恩將從前
領赴軍營應交馬駝等項展限至戊寅年交還以
示體卹再從前舒明等奏請安插達什達瓦部落
人衆於和通鄂博布拉罕察罕托輝地方原因卡
倫內額克阿喇勒等處現有都爾伯特人等居住
是以如此籌辦今都爾伯特人等既經遷去所有

達什達瓦人衆著即在額克阿喇勒地方游牧

命都爾伯特扎薩克多第巴之子尼爾完齊承襲扎

薩克

諭駐劄烏里雅蘇台辦事大臣舒明等擒拏青滾雜

卜事宜

上諭軍機大臣曰舒明等奏沙喇布魯圖等卡倫所

派和托輝特台吉兵丁聽從青滾雜卜私行棄卡

潛回等語前因青滾雜卜雖私行撤兵尚無背叛

形跡姑俟哈達哈等回時再行辦理今其罪狀已著不容稍緩著傳諭舒明等此時如哈達哈等已回即會同辦理否則即將現在駐劄兵丁酌量調遣會同親王成袞扎布得親扎卜桑寨多爾濟及塔爾瑪善等同至和托輝特游牧即將青滾雜卜并伊妻子拏解來京其屬人內聽從指使人等俱著擒拏正法俾衆人知所畏懼朕念青滾雜卜之祖博貝舊勳不忍削其封爵仍著額林沁之子旺

布多爾濟承襲貝勒其屬人等俱查出交旺布多
爾濟管轄上年青滾雜卜至伊犁時收取達瓦齊
之物甚多一一查出有應解京者即行解京餘著
賞給効力官員人等並將從前進兵時掠取馬匹
牲隻等一併查出歸公充用阿蘭泰著仍留納米
爾沙扎海軍營辦理事務俟青滾雜卜拏獲後再
將擅棄卡倫之台吉兵丁等查明從重治罪
諭定邊左副將軍哈達哈協擒青滾雜卜事宜

上諭軍機大臣曰青滾雜卜叛跡已著舒明等會同親王成袞扎布等領兵擒拏哈達哈自哈薩克回時務宜趲行會同辦理即已後期亦可堵禦青滾雜卜逃竄之路更為妥協再多爾濟策登亦係和托輝特部落今既辦理青滾雜卜若不行告知恐伊反生疑懼著哈達哈留心試看果其人無可疑則將擒拏青滾雜卜之事明白諭知且告以係青滾雜卜一人之罪與伊無涉令伊協力擒拏事後

尚當格外加恩若不可深信即無庸告知并將伊
拏送京師哈達哈務宜詳慎辦理

癸巳

命安插沙克都爾曼濟人衆於巴里坤

上諭軍機大臣曰雅爾哈善奏和碩特汗沙克都爾
曼濟及達什達瓦部落特古斯哈什哈之妻俱率
領所屬由朱爾都斯向巴里坤前來等語沙克都
爾曼濟上年來京入覲朕見其為人誠實深感朕

恩今因其舊游牧地方無以資生跋涉遠來殊堪
憫惻準噶爾頻年不靖自相蹂躪厄魯特等生計
自不免艱難然使台吉等各收集屬衆在各游牧
地方耕種牧養善自謀生不過一二年間元氣即
可全復今沙克都爾曼濟等雖向巴里坤前來究
非本土難以久居況現在喀爾喀地方居住之都
爾伯特輝特和碩特人等俱令移回舊游牧又節
次傳諭伊等嚴禁盜賊各安本業則沙克都爾曼

濟等自宜仍回本處但甫經遠至復令遷回不免
勞頓轉瞬又屆冬令行走稍艱今年即令沙克都
爾曼濟等暫住巴里坤地方俟明春再議遷回雅
爾哈善將此詳悉曉諭伊等並查明戶口人數酌
量賞給口糧以資食用其達什達瓦部落人衆亦
量為賞給即令由阿濟必濟卡倫前赴阿爾台會
同達什達瓦人等一併居住著交與富森辦理

甲午

命以德都摩垓圖古里克等地仍給哈密回人耕種
上諭軍機大臣曰黃廷桂奏據哈密貝子玉素富呈
稱從前哈密回人所種德都摩垓圖古里克等處
地方仍請賞給耕種等語哈密回人生齒日繁現
在準噶爾全部底定無庸於此等地方更設卡倫
著施恩將德都摩垓圖古里克地方仍賞給回人
耕種

命議敘副將滿祿等

上諭軍機大臣曰據達爾黨阿等奏副將滿祿叅將邁斯哈等護送軍營馬匹甚屬妥協滿祿邁斯哈奮勉急公著交部議敘

原任定西將軍策楞疏奏逆黨巴顏正法

策楞奏言前侍衛中秋拏獲厄魯特巴顏解至軍營臣等將伊所告阿逆帶領哈薩克兵三萬前來之語詳悉訊問實係捏造希圖搖惑衆心因即將巴顏正法奏入報

聞

八月戊戌

命議敘喀爾喀親王桑寨多爾濟

上諭軍機大臣曰桑寨多爾濟等奏青滾雜卜擅撤
卡倫兵丁業經派兵接續并將台吉阿雅喇等傳
布青滾雜卜撤兵原文查出呈覽桑寨多爾濟辦
理甚屬妥協著交部議敘俟擒獲青滾雜卜時并
將台吉阿雅喇等一併擒拏勿令脫逃至棄卡兵

丁皆係蒙古無知之人著加恩寬宥免其治罪并
通行傳諭各卡倫台吉兵丁等果能悔悟速回本
卡者台吉即指名具奏其兵丁酌量賞賜

辛丑

命安插伯什阿噶什烏巴什等屬人於額克阿喇勒
地方

上諭軍機大臣曰前降旨令達什達瓦部落人衆赴
額克阿喇勒地方游牧今舒明奏稱伯什阿噶什

烏巴什等前來入覲其屬人在青吉勒暫住等語
其地已與卡倫甚近著一併令赴額克阿喇勒地
方居住俟明年再令遷回舊游牧

壬寅

命喀爾喀貝勒策卜登協拏青滾雜卜

上諭軍機大臣曰前據舒明等奏喀爾喀貝勒策卜

登亦撤兵擅回朕意策卜登不應為青滾雜卜所

惑今復奏伊在納林喀喇地方暫行駐兵聽待調

遣等語看來實非聽信青滾雜卜之言果不出朕
所料至伊稱郭勒卓輝博博等俱已逃入俄羅斯
不必遣兵追逐所見甚是著傳諭策卜登即帶所
有兵丁會同親王成衮扎布等速往和托輝特擒
拏青滾雜卜伊係喀爾喀舊人今見青滾雜卜負
恩背叛必深為痛恨務奮力擒拏以雪衆喀爾喀
之恥

癸卯

命理藩院尚書納延泰馳驛前往北路軍營查辦事
務

甲辰

申諭烏里雅蘇台辦事大臣舒明等擒拏青滾雜卜
事宜

上諭軍機大臣曰納穆扎爾奏稱青滾雜卜叛跡已
著恐衆喀爾喀等俱為煽惑遂向伊等曉示利害
等語納穆扎爾辦理甚是喀爾喀等不免為青滾

雜卜搖惑然亦不過無知之輩其世受國恩明白
事體者決不應出此著傳諭舒明等遵旨即行辦
理並明白曉諭喀爾喀王公等令其協力擒拏毋
墮奸計再據巴蘭泰奏巴勒達爾達什丕勒齊旺
等告稱聞青滾雜卜欲擄掠伊等游牧伊等俱回
至游牧豫備等語看此情形愈宜即為擒治舒明
等務期妥速辦理

駐劄巴里坤辦事大臣雅爾哈善等疏奏回人

莽噶里克遣子白和卓入

覲日期

雅爾哈善等奏言臣等遵

旨曉諭回人莽噶里克暫留部落約束屬衆令伊子
弟中派出一人入

覲今據莽噶里克遣伊子白和卓入

覲於七月二十七日自巴里坤起程進京奏入報

聞

乙巳

命授喀爾喀親王成袞扎布為定邊左副將軍

上諭軍機大臣曰親王成袞扎布舊任將軍今定邊左副將軍哈達哈撤兵將回著授成袞扎布為定邊左副將軍哈達哈回時將印信交與掌管成袞扎布接到諭旨即辦理將軍事務帶兵前往和托輝特擒拏青滾雜卜舒明阿蘭泰桑寨多爾濟得親扎卜塔爾瑪善等俱著授為叅贊大臣桑寨多

爾濟如尚未同舒明進兵即在彼處會同阿蘭泰
辦理馬匹事務

命申諭喀爾喀王公等

上諭喀爾喀王公等曰副都統巴蘭泰奏稱扎薩克
圖汗巴勒達爾等屬人揚言青滾雜卜欲搶掠衆
喀爾喀等游牧伊等俱回游牧防護等語青滾雜
卜負恩背叛種種不法早應擒拏治罪今又欲搶
掠喀爾喀等游牧情理更屬可惡喀爾喀衆王公

等皆沐國家厚恩自不為青滾雜卜煽惑朕可深信巴勒達爾等之歸保游牧亦無庸深責但青滾雜卜欲搶掠喀爾喀伊獨非喀爾喀之人自相戕賊伊將焉往即如羅卜藏丹津逃竄準噶爾已數十年今伊犁底定尚不能逃天網若俄羅斯不容留內地逃人亦爾等所知者青滾雜卜不過逞其奸詐搖惑衆心朕已早料其無能為也至巴勒達爾等聞有將喀爾喀王公盡行拏問之語其為青

滾雜卜奸計更屬顯然喀爾喀王公等數年來効
力戎行朕加恩體卹無所不至惟額林沁多爾濟
達木巴扎卜等二人貽悞軍務不得已治以應得
之罪此外之優封晉秩者不可勝計即以青滾雜
卜而論上年略知奮勉即施恩晉封郡王其種種
不法之處皆曲為寬宥今乃肆行背叛理應絕其
封爵朕尚念其祖父舊勲令旺布多爾濟承襲貝
勒朕辦理庶政一秉至公毫無偏倚特為詳悉曉

諭爾喀爾喀王公等務宜遵朕訓示黽勉効力無
為浮言所惑自取罪戾

命布魯勒之子瑪木特承襲公爵

上諭軍機大臣曰厄魯特公布魯勒之子瑪木特同
輝特汗巴雅爾等遣使來京請安詢知布魯勒上
年出痘身故其公爵尚未承襲因特施恩令瑪木
特承襲布魯勒公爵但外藩王公扎薩克等襲職
俱由該盟長等擬定應襲之人報部奏請今噶爾

藏多爾濟等係新降之人不諳定例未經報部著
傳諭兆惠遍行曉諭嗣後有事故應行襲爵之人
該盟長等報明該部奏請不得援此次瑪木特之
例

丙午

命喀喇沁貝子瑚圖靈阿郎中噶木布馳驛前往北
路軍營清查臺站

命哲卜尊丹巴胡土克圖等曉諭喀爾喀事宜

上諭哲卜尊丹巴胡土克圖等曰青滾雜卜負恩背
叛種種不法已屢降旨曉諭衆喀爾喀等喀爾喀
王公等世受國恩自必切齒痛恨雖駐劄卡倫臺
站台吉兵丁亦有為青滾雜卜所惑擅回游牧者
此皆無知之輩斷非有心黨惡此時如已回至卡
倫臺站朕自格外寬宥不加譴責若仍觀望不前
一經查出定行從重治罪胡土克圖乃喀爾喀部
落供養大喇嘛尚卓特巴喇嘛係代胡土克圖辦

理事務之人應於爾等信任之沙畢納爾內揀選
數人前往各游牧曉諭俾知安分守法毋為浮言
所惑

丁未

命遣烏梁海總管赤倫協擒青滾雜卜

上諭軍機大臣曰舒明等奏青滾雜卜現在游牧居
住其屬衆移居唐努山地方等語唐努山離新烏
梁海甚近著舒明等選派侍衛數員同桑寨多爾

濟護衛都喇勒遣往新烏梁海曉諭總管赤倫帶
兵協擒青滾雜卜赤倫果能奮力朕自格外加恩
命獎賞扎薩克台吉遜都卜等

上諭軍機大臣曰普慶等奏辦理值班事務扎薩克
台吉遜都卜及管理馬匹扎薩克台吉承袞扎卜
等人甚誠實俱能約束屬人又協理台吉達瑪林
接續臺站行走奮勉等語遜都卜等甚屬可嘉著
賞給荷包以示獎勵俟拏獲青滾雜卜後另行加

恩值班地方乃伊等聚集之處著抄錄朕旨通行
曉諭至貝子諾爾布扎卜公多岳特等擅帶牧放
馬匹私回游牧著交將軍成衮扎布查辦並令其
即往原駐劄處管理馬匹伊等不諳法度此次姑
從寬免如更有悞差委朕必重治其罪

戊申

命西北兩路將軍等暫停進兵哈薩克

上諭軍機大臣曰達爾黨阿哈達哈等前往哈薩克

擒拏阿逆今天時漸寒馬力亦恐疲乏如阿逆尚
未就擒毋庸更為深入著傳諭一面撤兵一面曉
諭阿布賚朕念哈薩克係邊遠部落以一逃人之
故大兵久壓其境使伊等不得安居是以暫行撤
兵以圖再舉達爾黨阿哈達哈等即將厄魯特兵
丁遣回各游牧自行輕騎帶兵速由阿爾台一路
前行併力擒拏青滾雜卜其後隊兵丁亦派員帶
領陸續而行即此時青滾雜卜已經就擒亦須帶

兵赴喀爾喀各游牧善為安撫并諭哈寧阿仍遵
前旨帶兵數百名前往伊犁會同兆惠辦事

乙酉

命綏遠城將軍富昌等選派兵丁聽候調遣

上諭軍機大臣曰親王成袞扎布領兵擒拏青滾雜
卜諒不日即可就擒但恐尚有需用內地兵丁之
處應豫為派定著傳諭綏遠城將軍富昌於所轄
兵丁內揀選二千名豫備候朕旨到日即帶領起

程并諭吉林將軍額爾登棟選馬數千匹解往黑龍江以應打牲索倫等處兵丁調遣之用其西林郭勒盟長親王品級索諾木喇卜坦厄魯特貝勒羅卜藏多爾濟等游牧與喀爾喀甚近倘或需添派兵丁即於此二處各選兵一二千名聽候調遣並傳諭黃廷桂速赴寧夏會同羅卜藏多爾濟等商辦馬匹及賞給兵丁事宜

庚戌

命仍授蘇巴什里公爵賞銀三百兩同侍衛誠林馳

驛前往軍營辦理臺站事務

命郡王策布登扎布協同親王成袞扎布辦事

上諭軍機大臣曰朕命親王成袞扎布為定邊左副

將軍擒拏青滾雜卜應需人協同辦理伊弟策布

登扎布現在軍營著傳諭哈達哈即令策布登扎

布會同富德帶兵五六百名速行回至成袞扎布

處辦事

命副都統阿爾斌領兵赴烏里雅蘇台

上諭軍機大臣曰昨降旨令富昌選派兵二千名聽候調遣現在烏里雅蘇台內地兵丁甚少地方緊要著即於所選兵丁內先派一千名交副都統阿爾斌鶴山先行帶往駐劄餘著富昌續行帶往

辛亥

命授納穆扎爾得木楚克為叅贊大臣

上諭軍機大臣曰納穆扎爾照管輝特人等已回各

原游牧現在無事著與得木楚克同赴將軍成衮
扎布處辦事俱著在叅贊大臣上行走

命授扎薩克台吉遜都卜承衮扎卜等公爵

上諭軍機大臣曰據普慶等奏扎薩克台吉遜都卜

承衮扎卜告稱得親扎卜給一無印文書傳令伊

等散回游牧伊等未經聽從等語遜都卜承衮扎

卜深曉大義甚屬可嘉著加恩賞給公爵又據奏

稱貝勒車木楚克扎布接續臺站亦屬奮勉著賞

給荷包以示獎勸至得親扎卜給發無印文書傳
散人衆或係他人假冒伊名亦未可定姑從寬不
必深究著傳諭得親扎卜速飭所屬仍回各所派
地方接續臺站安設卡倫不得稍有貽悞

命定西將軍達爾黨阿等查辦貝勒策登扎卜等

上諭軍機大臣曰昨已降旨令達爾黨阿哈達哈等
撤兵會同成袞扎布擒拏青滾雜卜今喀爾喀貝
勒策登扎卜復棄其所管臺站而貝勒策卜登亦

私回游牧伊等係世受國恩之人乃目無法紀深
為可恨著傳諭達爾黨阿等回至軍營時將策登
扎卜等傳齊聽候調遣如少有可疑即將伊等一
併擒拏治罪

壬子

命以青滾雜卜背叛罪狀

宣諭中外

上諭大學士曰和托輝特青滾雜卜乃喀爾喀內一

小部落無足比數者上年跟隨班第等出兵伊犁
始則趨奉班第後見阿逆潛蓄叛志亦隱有二心
與賊交結及見朕辦理額林沁多爾濟之後心懷
疑懼自軍營私行逃歸遂將伊卡倫臺站兵丁盡
行撤回并布散浮言多方煽惑衆喀爾喀人等亦
有竟棄臺站潛歸游牧者在衆喀爾喀斷不因伊
一人負固即生叛心然青滾雜卜則已逆跡顯著
不得不明正其罪現已命親王成衮扎布為定邊

左副將軍督師擒拏自可計日授首并屢經降旨
曉諭衆喀爾喀等協力擒勦如能即行獲獻自可
無煩師旅即不然則就近調遣布置我之兵力已
足戡定况現今準噶爾盡入版圖其北則俄羅斯
境地伊即欲竄逃斷不能脫身遠颺適足見其狂
愚自取誅滅耳况朕年來辦理準噶爾一事本意
原非得已試思策凌策凌烏巴什等來降天朝豈
可拒而不納至阿逆率衆來歸若使深加拒絕伊

有不早肆劫掠為患於喀爾喀者乎繼而狡賊中
叛勢不得不命將追擒如令置而不問伊必潛據
伊犁侵擾無已是朕之前後興師問罪者全為保
護衆喀爾喀游牧而青滾雜卜轉以用兵致累為
詞流言四布在衆喀爾喀怯懦性成妄生疑懼於
雍正年間用兵之際即屢有劫奪之事旋亦綏靜
今經朕曉諭之後揆其事理青滾雜卜孤立之形
已見自可計日就縛於西陲大勢本無關輕重但

其反覆背恩實出情理之外恐我內外臣工未能
周悉用將辦理緣由宣諭知之

癸丑

賊黨阿巴噶斯等正法

上諭軍機大臣曰刑部監禁阿巴噶斯庫什克什木
等本應俟阿逆擒獲時一同正法今已患病垂斃
著即行凌遲以彰國憲

擅殺宰桑恩克博羅特之綽克察等正法

上諭軍機大臣曰兆惠奏查出擅殺宰桑恩克博羅特之得木齊綽克察等請旨正法等語著照所奏辦理其查拏綽克察等之得木齊策凌巴布和托甚屬奮勉著加恩補授佐領並賞給孔雀翎以示

鼓勵

命封回人莽噶里克公爵授宰桑賽齋喇呼散秩大

臣

上諭軍機大臣曰據兆惠奏吐魯番回人莽噶里克

懇請將伊屬衆編次旗分佐領等語莽噶里克感戴朕恩甚屬可嘉著施恩封授公爵卽照額敏和卓之例編次旗分佐領再宰桑賽齋喇呼得木齊之子阿卜濟爾噶爾等將盜竊臺站馬匹賊人擒拏亦屬可嘉著授賽齋喇呼為散秩大臣賞緞二疋阿卜濟爾噶爾等賞緞一疋銀二十兩以示鼓勵

乙卯

命綏遠城將軍富昌等帶兵接續臺站

上諭軍機大臣曰納延泰奏喀喇沁二十七八等臺站為喀爾喀賊人搶掠已交臺站附近王車林拜都卜等部落人等查拏賊人並向歸化城調兵接續臺站等語辦理甚是前已降旨諭富昌派兵二千名前往烏里雅蘇台又派公蘇巴什里侍衛誠林會同達松阿等將喀喇沁臺站安設至烏里雅蘇台並據蘇巴什里等奏聞安設妥協者再傳諭

富昌先派兵三百名作速起程馳赴並著瑚圖靈
阿保德速往察哈爾四旗選兵一千名帶領至烏
里雅蘇台接續臺站查拏賊人其車林拜都卜上
年進兵伊犁病故應襲王爵未經該盟長等擬請
承襲今著加恩即令伊子丹衷多爾濟承襲務將
搶掠臺站賊人令其擒拏治罪

丁巳

命公敏珠爾多爾濟領兵赴北路軍營

上諭軍機大臣曰公敏珠爾多爾濟著授為營長帶
領察哈爾兵丁馳驛前往北路軍營並派侍衛敏
珠爾等九員及司員留保柱等齎諭送往哲卜尊
丹巴胡土克圖處曉諭

戊午

命章嘉胡土克圖赴喀爾喀會盟

上諭喀爾喀王公等曰爾衆喀爾喀世受國恩今因
和托輝特青滾雜卜煽惑竟有擅棄卡倫臺站私

回游牧者應即發兵致討已派滿洲蒙古內扎薩克等兵丁分路前往繼思爾等無知負恩一朝殄滅心實不忍是以特派章嘉胡土克圖率同內地大臣及內扎薩克王公等令赴鄂爾昆塔米爾等處齊集爾喀爾喀衆王公等會盟爾等果能感念國恩深悔悞聽青滾雜卜之罪即曉諭擅棄臺站卡倫人等仍回各處當差協力擒拏青滾雜卜不惟寬宥爾罪並將格外加恩倘爾等力弱不能擒

卷三十
拏朕自派兵辦理亦不爾責爾等如能遵朕諭旨
朕即將現在已發兵丁酌量撤回使爾等照舊安
居毫無侵擾爾等其深思熟計一切與章嘉胡土
克圖陳明轉奏其哲卜尊丹巴胡土克圖係爾衆
喀爾喀供養喇嘛亦著前來會盟

命授察罕鼐濟為頭等侍衛齊里克特衣為三等侍
衛馳驛前往尚書納延泰處聽候差遣

命安插厄魯特達瑪林等

上諭軍機大臣曰據雅爾哈善等奏厄魯特達瑪林
稟稱伊係額駙阿保屬人從前出征和通呼爾哈
淖爾時為準噶爾所擄今帶領妻子并所屬布庫
勒等四十戶投來等語達瑪林既係厄魯特郡王
額駙阿保屬人即交與阿保之子貝勒羅卜藏多
爾濟游牧內安插其布庫勒等四十戶著交兆惠
於二十一昂吉內歸併居住

議定吐魯番回人疆界事宜

定邊右副將軍兆惠疏奏回人額敏和卓遷至
魯克察克地方應與回人莽噶里克所屬地方
畫定疆界事宜一摺得

旨軍機大臣議奏尋議吐魯番東界自闡展至喀喇
和卓地方原係額敏和卓所居舊地應仍給與
額敏和卓管轄其西界自伊拉里克至阿斯塔
克地方應令莽噶里克管轄至額敏和卓懇借
麥種一千石俟明年收穫後交還籽種一千石

外再交麥一千石次年交三千石自第三年為始每年交四千石莽噶里克亦請自明年為始交麥五百石應照所請借給所有每年交納麥石應令副將軍兆惠指定何地運往存貯回人額敏和卓等永遠輪納麥石應酌量賞賜布疋茶葉等物以示鼓勵請交與總督黃廷桂查議請

旨賞給再額敏和卓請於托里布拉克他呼那呼齊

克塔木闢展等五處每處各設兵五名馬十匹
馳遞事件其伊拉克等處亦令莽噶里克派
人安設臺站專司馳遞奏入

上從之

己未

命授貝勒達什丕勒郡王品級

上諭軍機大臣曰據誠林等奏喀爾喀貝勒達什丕
勒帶領屬人自二十五臺至二十九臺接續臺站

等語達什丕勒甚屬奮勉著加恩授郡王品級其
搶掠臺站之人查係得親扎卜等四旗所屬該扎
薩克人既衆多所有此等愚妄無知之輩或不能
遍行覺察著傳諭將軍成衮扎布轉飭得親扎卜
等嚴行查出將為首搶掠者即行正法其餘概從
寬免

庚申

命派兵協擒青滾雜卜

上諭軍機大臣曰北路臺站俱經接續其調往綏遠城及察哈爾兵丁除補設卡倫臺站之外餘著俱赴將軍成衮扎布處會同擒拏青滾雜卜瑚圖靈阿富昌保德哲庫納阿爾斌領兵到彼俱著授為叅贊大臣隨同成衮扎布辦事尚書納延泰親王得親扎卜留駐烏里雅蘇台會同普慶等查出搶掠臺站人等審明正法

辛酉

諭定邊右副將軍兆惠駐兵防守事宜

上諭軍機大臣曰據兆惠奏稱大兵自哈薩克撤回
應酌定駐劄地方已與圖什墨勒扎爾呼齊等商
議在空格斯安集哈雅等處駐兵防守等語大兵
駐劄原為保護衆厄魯特游牧應在衆厄魯特游
牧之外周圍布置設遇哈薩克侵擾大兵即行抵
敵或再調厄魯特兵同禦方合機宜且使厄魯特
等知大兵全為保護伊等起見愈加感戴兆惠即

曉諭圖什墨勒扎爾呼齊等遵照辦理不必泥定
何地再大兵撤回後坐臺兵丁亦應裁汰所有厄
魯特坐臺人等俱令回至各游牧惟酌派察哈爾
兵丁安設臺站倘有不敷再添派綠旗兵丁同往
辦理

壬戌

上駐蹕張三營都爾伯特親王伯什阿噶什貝子烏

巴什等入

觀

命賜筵宴

癸亥

命議敘定邊左副將軍成袞扎布等

上諭軍機大臣曰定邊左副將軍成袞扎布及親王

得親扎卜感戴朕恩聞逆賊青滾雜卜背叛即與

衆會盟調集兵丁復令哲卜尊丹巴胡土克圖曉

諭衆喀爾喀等共圖擒賊甚屬可嘉著交部議敘

此時成衮扎布亦毋庸領兵赴納米爾沙扎海會
同得親扎卜致稽時日惟應速行進兵擒拏逆賊
並曉諭衆喀爾喀等毋為浮言煽惑自取罪戾至
舒明阿蘭泰等不能早擒逆賊反致衆人疑懼如
巴勒達爾達什丕勒等屬人俱擅自棄回游牧皆
由伊二人辦理不善之故已命納穆扎爾為叅贊
大臣協同將軍辦事著成衮扎布將舒明阿蘭泰
撤回詢明伊等前後辦理情節據實具奏

甲子

命定邊左副將軍成衮扎布查拏貝勒策卜登等

上諭軍機大臣曰據烏里雅蘇台辦事大臣等奏貝勒策登扎卜策卜登等俱私回游牧等語策登扎卜人本庸懦雖私回游牧不過誤聽浮言所致無庸深究惟貝勒策卜登係喀爾喀舊人受恩深重乃亦棄其職守擅自逃回情甚可惡著傳諭將軍成衮扎布將策卜登拏解來京前曾降旨旺布多

爾濟令其擒拏青滾雜卜即將伊承襲貝勒如不行擒獻應與青滾雜卜一體辦理其屬人即著賞給將軍成衮扎布再貝勒品級車木楚克扎布前在軍營甚著勞績此次接續臺站亦屬奮勉著加恩封為貝勒管理臺站台吉扎木揚因阻止臺站人逃散反被擒執甚屬可憫應如何加恩之處著成衮扎布奏聞請旨

乙丑

命獎賞出征哈薩克官兵

上諭軍機大臣曰達爾黨阿哈達哈等奏稱領兵赴哈薩克擒拏阿逆兩次與哈薩克交戰斬獲甚多等語達爾黨阿哈達哈等領兵深入奮勇可嘉哈達哈前已賞給雙眼翎達爾黨阿亦著賞給所有効力官兵俱著達爾黨阿等查明奏聞交部議敘前已降旨令伊等暫撤大兵此時自應接到仍著遵前旨辦理脫逃阿逆皆由策楞玉保二人遲悞


退縮之罪今玉保雖同赴哈薩克並未立功策楞亦領兵繼進皆因接朕屢次訓飭之旨勉強前赴初非出於本心伊二人之罪實屬萬無可逭著達爾黨阿等由哈薩克回時仍遵前旨將策楞玉保拏解來京治罪扎拉豐阿係蒙古人且未經更事其罪尚與策楞玉保二人有間前已革去王爵仍著加恩授為貝子公明瑞派往軍前行走迅速此次同達爾黨阿等奮勇行陣甚屬可嘉著授為副

都統額爾登額亦能効力自贖著加恩投為頭等
侍衛

命獎諭喀爾喀親王桑寨多爾濟等

上諭軍機大臣曰叅贊大臣喀爾喀親王桑寨多爾
濟感戴朕恩將擅棄卡倫人等力為阻止甚屬可
嘉現在軍營正在需人毋庸前來入覲著即赴將
軍成衮扎布處協辦擒賊事務又濟福達禮善率
領得親扎卜之子諾爾布扎卜接續臺站辦理妥

協濟福著授為副都統達禮善著授為二等侍衛
其諾爾布扎卜果能奮勉出力即行奏聞加恩



平定準噶爾方略正編卷三十

欽定四庫全書

史部

平定準噶爾方略正編卷三十一至

詳校官監察御史臣孫家賢

通政使司副使臣莫瞻業覆勛

總校官進士臣朱 鈐

校對官編修臣周厚 轅

謄錄監生臣汪 瀾

欽定四庫全書

平定準噶爾方略正編卷三十一

乾隆二十一年秋九月丙寅朔

命停派阿拉善兵丁赴北路軍營

上諭軍機大臣曰前因擒拏青滾雜卜降旨令阿拉善貝子羅卜藏多爾濟選兵一二千名聽候調遣今將軍成衮扎布遵朕諭旨已帶兵前往擒拏逆賊諸務俱次第辦理所有羅卜藏多爾濟豫備兵

丁著停其派往

侍衛誠林等疏奏接續臺站情形

誠林等奏言據員外郎永常報稱自第十六臺至第二十二臺俱已派兵接續其自第二十三臺至二十七臺經貝勒達什丕勒每臺各派兵五名馬十五匹馳遞事務復據親王得親扎卜遣護衛達瑪林報稱已將二十八九兩臺派兵接續又聞自二十九臺至烏里雅蘇台各臺站

俱經駐劄烏里雅蘇台大臣委員帶兵按站接
續臣等查軍臺馳遞文報關係緊要今各臺雖
皆接續所需兵丁馬匹尚應添設容臣會同蘇
巴什里福鼐等商酌辦理奏入報

聞

丁卯

諭定邊左副將軍成袞扎布曉諭喀爾喀王公等

上諭軍機大臣曰據得親扎卜等移咨濟福文內稱

舒明等已調厄魯特策凌等兵丁且有將喀爾喀
王公等俱行擒治之語是以巴勒達爾等俱回游
牧等語朕前降旨令將軍成袞扎布調遣策凌達
什達瓦等兵丁齊集軍營原因衆喀爾喀等均為
叛賊煽惑不得不為籌辦今不過擒拏一么膺逃
虜則厄魯特策凌等兵不但無庸遣派併可不令
與聞至擒治喀爾喀王公一語尤屬不經朕撫馭
臣下綱紀肅清即一軍士賞罰亦必請旨遵行喀

爾喀王公等自問並無罪譴何至即行擒治此明
係伊等擅棄臺站卡倫懼罹罪網故為此飾詞以
藉口耳著即曉諭衆喀爾喀王公等現在各處調
遣兵丁盡行撤回伊等務宜各安游牧奮勉効力
毋事驚懼舒明阿蘭泰等前此辦理殊屬未協已
降旨令成衮扎布查明具奏現命納穆扎爾為叅
贊大臣舒明等務宜和衷共濟隨同將軍成衮扎
布速擒逆賊毋得稍存退諉

戊辰

命查拏喀爾喀搶掠賊人

上諭軍機大臣曰據遣往軍營侍衛瑚畢圖報稱途中遇喀爾喀等搶奪物件旋行諭止等語喀爾喀扎薩克台吉等俱不為青滾雜卜所惑仍赴臺站卡倫効力而其屬下無知人等尚有肆行搶奪者此風斷不可長且於伊等生計亦大有關係伊等所用布疋茶葉等物全賴內地商人販往今若任

其搶奪不行追還則商人自必裹足不前且從此各部落互相效尤為害滋甚如準噶爾部落分裂至此皆彼此互相搶奪所致著通行飭禁並令該扎薩克台吉等將沿途搶掠賊人一查出從重治罪以示懲戒

己巳

命停派察哈爾兵丁赴北路軍營

上諭軍機大臣曰據瑚圖靈阿等奏稱已選派察哈

爾兵丁一千名帶往軍營等語現在喀爾喀王公等俱各派兵接續臺站將軍成衮扎布亦即遵旨往擒青滾雜卜察哈爾兵丁無庸調往著傳諭瑚圖靈阿等即令兵丁各回游牧但念伊等迅速啓行雖行走不過數日然業經整裝前往不無所費著加恩將派出兵丁一千名各賞給錢糧兩月以示優卹

定西將軍達爾黨阿等疏奏擊敗哈薩克情形

達爾黨阿等奏言臣等領兵至雅爾拉地方遣
章京雅卜唐阿前往搜查知哈薩克兵丁俱潛
伏於山溝幽僻之地七月初三日遣畢里袞帶
兵一百名占據右翼高阜之處又派烏爾登帶
兵一百名進山引出賊衆臣等帶兵一千名各
按隊伍前進賊衆二千餘人迎戰臣等派齊努
渾瑪瑞特通額爾登額帶領隊伍分部前進
阿里袞鄂實哈寧阿明瑞管理左右兩翼臣達

爾黨阿扎拉豐阿統領大隊兵丁奮勇殺賊斬
馘五百七十餘人生擒十一人中箭帶傷者甚
多復於十一日追逐至努喇地方整兵前進遇
賊衆二千餘人奮勇鏖戰殺賊三百四十餘人
生擒十人內有阿逆宰桑扎南布臣等嚴加訊
問知阿逆與霍集伯爾根帶兵迎戰阿逆恐被
大兵認識改換藍纛因不能支持大兵即先遁
去又據擒獲哈薩克楚魯克供稱伊兄弟二人

向為阿布賚所信任情願往諭阿布賚擒獻阿
逆等語查從前拏獲哈薩克楚爾滿時即供稱
楚魯克阿喇勒拜兄弟二人素為阿布賚倚任
臣等即將阿喇勒拜留在軍營令楚魯克於七
月十二日起程限十五日令其曉諭阿布賚擒
獻阿逆奏入得

旨下部知之

定邊左副將軍哈達哈等疏奏擊敗哈薩克情

形

哈達哈等奏言據貝子達爾扎等報稱卡倫地方見哈薩克千餘人自巴顏山向西前行等語臣等即派扎薩克三都卜等帶兵六百名前往奮擊臣等隨亦帶兵策應共將哈薩克擊敗斬馘百餘人奪其馬匹輜重並生擒五人遂加刑訊供稱現在帶兵迎戰即係阿布賚其阿睦爾撒納霍集伯爾根等帶兵一千名往尋西路大

兵前去阿睦爾撒納自至哈薩克境內我部落
內老成曉事之人僉謂阿睦爾撒納為害四衛

喇特歸附

大皇帝今復背叛竄入我地是特移禍於哈薩克若
不即行擒獻恐俱不能安生而阿布賚以阿睦
爾撒納如窮鳥投林希圖免死不便遽行執獻
遂與阿睦爾撒納商定令各游牧湊集兵丁阿
布賚先領兵一千至蒿哈薩拉克山遙見兵勢

甚大心懷畏懼旋為大兵擊敗前此阿布賚知
大兵將至即將游牧遠移等語臣等伏思哈薩
克衆情猶豫阿布賚袒護阿逆墮其奸計今仰
賴

皇上洪福擊敗逃竄阿布賚業已膽破臣等即行帶
兵追逐前進奏入得

旨下部知之

定邊右副將軍兆惠等疏奏籌辦屯種事宜

兆惠等奏言前奉

旨令於伊犁附近地方酌量派遣綠旗兵丁屯種查
自巴里坤至濟爾瑪台積木薩烏魯木齊羅克
倫瑪納斯安濟哈雅晶等處俱有地畝可資耕
種伊犁附近地方約有萬人耕種地畝空格斯
朱爾都斯等處可種之地亦多但須豫為籌辦
方不悞來春耕種之期現在伊犁有回人三十
餘名擬酌增至百人請

卷三十一
敕巴里坤辦事大臣及甘肅撫臣派出綠旗兵一百
名委員酌帶籽種農具耕牛於明年正月內前
來臣等按地分給耕種俟試看一年再行辦理
奏入報

聞

庚午

定邊右副將軍兆惠等疏奏遣副都統阿敏道
領兵收服回人事宜

兆惠等奏言上年遣往回城曉諭之侍衛托倫
泰至今未回臣等詢問烏什城回人伯克噶岱
默特及扎爾呼齊錫克錫爾格等俱稱使人遲
久未回回人地方似有事故或波羅泥都等到
彼滋事或中途有布魯特回人生變俱未可定
若遣兵赴阿克蘇庫車烏什等處曉諭收服其
衆則葉爾羌喀什噶爾回人等聞風震懾等語
臣等伏思葉爾羌喀什噶爾各回人若不及時

辦理將來或與布魯特會合滋生事端因公同
商議遣副都統銜阿敏道領兵一百名令扎爾
呼齊錫克錫爾格帶領空格斯朱爾都斯游牧
厄魯特兵三千名同烏什城伯克噶岱默特前
往酌量於九月十五日起程收服各處回人並
採取侍衛托倫泰信息如阿克蘇庫車等處回
人果能恭順每年應納貢賦或令其赴吐魯番
向額敏和卓交納或送交伊犁辦事大臣俟到

彼處酌定倘敢抗違即行勦滅奏入報

聞

辛未

命獎賞扎薩克額林沁等

上諭軍機大臣曰舒明等奏稱扎薩克額林沁等率
領屬人牧放馬駝甚屬勤勉等語額林沁等當衆
喀爾喀驚擾之際約束屬人無悞差委甚屬可嘉
著加恩賞給額林沁策登敦多卜賚崇扎卜孔雀

翎仍酌量賞給緞疋協理台吉旺楚克多爾濟班
扎鄂爾本敏珠爾管旗章京敦多卜達什副管旗
章京德勒格爾博特巴珠喀達爾扎叅領喀爾察
海阿玉奇亦各酌賞緞疋其各該處收放兵丁例
不支領錢糧並著加恩按月賞給以示鼓勵

命授貝勒剛多爾濟等為都爾伯特正副盟長

上諭軍機大臣曰都爾伯特部落訥默庫盟長員缺
尚未遴員補授貝勒剛多爾濟自授副盟長以來

約束所屬甚屬妥協著即授為盟長其副盟長員
缺著貝勒巴圖博羅特補授

命扎薩克輔國公布顏特古斯之子塞楞承襲公爵

甲戌

諭副都統舒赫德等擒拏烏梁海郭勒卓輝事宜

上諭軍機大臣曰舒赫德奏稱巡查臺站至努克木
倫地方知遷移游牧之厄魯特等沿途有搶奪馬
匹之事即親見策凌策凌烏巴什等嚴行查出其

額爾齊斯河等處臺站為烏梁海郭勒卓輝搶奪
已遣侍衛三都卜領兵勦滅等語舒赫德辦理俱
合機宜策凌等屬人沿途偷盜馬匹經舒赫德交
辦策凌等即行查出交還甚屬可嘉著賞給策凌
等荷包以示獎勵至烏梁海郭勒卓輝潛蹤逃竄
今復敢肆行搶掠現在策凌等已移往額爾齊斯
即著舒赫德傳諭策凌等派兵擒拏以正典刑如
因伊等新移游牧不便派兵舒赫德即將現在所

領兵丁會同三都卜奮往擒拏務期弋獲再前經
降旨令郡王策布登扎布會同富德即由軍前馳
赴親王成衮扎布處協同辦事令成衮扎布已領
兵擒拏青滾雜卜隨同辦事之人亦多策布登扎
布等領兵至汗哈屯地方即確查郭勒卓輝藏匿
何處及逃竄之烏梁海等盡行勦滅事竣再赴成
衮扎布處辦事

乙亥

定邊左副將軍哈達哈等疏奏追襲哈薩克情形

哈達哈等奏言臣等擊敗哈薩克後復派散秩大臣達什策凌副都統職銜瑚爾起等率兵追趕並派總管鄂博什侍衛奇徹布帶兵隨後接應臣等統領大兵繼進據達什策凌瑚爾起等報稱追及阿布賚後隊斬首百餘級獲馬二百餘匹器械百餘件又與阿布賚別隊之布滾拜

等交戰殺賊二十餘人生擒一人獲馬四十餘
匹即由阿布賚布滾拜逃竄之路往追賊衆已
紛紛四散達什策凌瑚爾起等復拏獲哈薩克
賊人杭吉爾圖巴圖魯等四名詢知兩日前阿
睦爾撒納為西路大兵擊敗現在逃往呢雅斯
圖山中臣等即帶兵往追四面瞭望並無蹤跡
因復詢問拏獲賊人告稱伊等初議在此山據
守今看來已歸阿布賚巢穴等語續據鄂博什

奇徹布報稱至索克地方遇賊二百餘人即行
追擊斬馘八人餘衆俱逃竄等語臣等仍帶兵
前進於七月二十三日抵伊什勒地方與西路
大兵會合公同商議擒勦事宜奏入得

旨下部知之

諭定西將軍達爾黨阿等撤兵事宜

達爾黨阿等奏言臣等擒獲哈薩克楚魯克阿
喇勒拜令其曉諭阿布賚擒獻阿逆續經臣哈

達哈等擒獲杭吉勒圖昭華什等亦請往諭阿
布賚速行擒獻是以將杭吉勒圖拘留釋放昭
華什回巢嗣於七月二十七日回至軍營據楚
魯克稟稱奉命往諭阿布賚據阿布賚云我等
帶兵前來並非敢與

大國相敵因尋阿睦爾撒納途間被大兵擊敗阿睦
爾撒納如窮鳥投林擒獻無難懇求

大皇帝開一面之網全伊一命等語昭華什亦同楚

魯克前來臣等即諭知楚魯克等我等欽奉

大皇帝諭旨統領兩路大兵擒拏阿逆一日不獲斷
不中止今阿布賚等並未將叛賊擒獻反二三
其說為阿逆請命明係爾等緩兵之計不知反
為爾衆哈薩克招禍復據楚魯克等稟稱我阿
布賚為阿睦爾撒納請命亦不過希冀萬一如
必責令擒獻豈敢抗違請再予限十五日我等
星夜馳回即將阿睦爾撒納擒獻不敢欺罔等

語臣等復向伊等曉諭無論爾等是否緩兵之計我等惟遵

大皇帝諭旨進兵追擒叛賊凡遇爾游牧之處盡行
勦滅為利為害爾等與阿布賚宜熟思深計是
日仍將楚魯克昭華什等遣回臣等公同商議
阿布賚果否擒獻阿逆事屬未定是以仍帶兵
前進奏入

上諭軍機大臣曰達爾黨阿哈達哈等奏稱遣人曉

諭阿布賚責令擒獻阿逆等語阿逆自不能倖逃
天網此時阿布賚即未將阿逆擒獻現在時屆冬
寒前經降旨令伊等暫行撤兵恐途中馳遞遲延
伊等尚未接到著再傳諭達爾黨阿等仍遵前旨
撤兵並將擒獲哈薩克人內釋放一二人回巢令
其明白曉諭阿布賚今奉大皇帝諭旨天氣嚴寒
旨行撤兵爾等若不即將阿逆擒獻明春仍令大
兵前來盡將爾部落勦滅撤兵後達爾黨阿等會

同成衮扎布擒拏青滾雜卜及遣哈寧阿赴伊犁
協同兆惠辦事一切俱遵前旨行至厄魯特宰桑
巴桑甚著勞績著加恩補授內大臣賞銀二百兩
索倫佐領莫托和里著加恩補授頭等侍衛賞銀
一百兩此次軍前効力人員俱著查明議敘

丙子

命授台吉阿喇卜坦等公品級

上諭軍機大臣曰喀爾喀扎薩克台吉阿喇卜坦辦

理臺站甚屬妥協協理台吉紀瓦遇納延泰遣來
奏事之慶祿等應付馬匹亦能黽勉急公著加恩
賞給阿喇卜坦紀瓦公品級其台吉達爾巴圖桑
寨林沁俱著賞戴孔雀翎以示鼓勵

命授扎木禪察達克為內大臣

上諭軍機大臣曰扎木禪察達克効力行間甚屬奮
勉著加恩補授內大臣仍各賞銀一百兩現在將
軍成袞扎布領兵擒拏青滾雜卜並著察達克帶

領所屬兵丁協同擒拏

綏遠城將軍富昌疏奏領兵赴烏里雅蘇台軍

營日期

富昌奏言臣遵

旨於綏遠城兵丁內先派三百名交歸化城都統阿

爾賓帶領於八月二十一日起程赴尚書納延

泰處差委其餘兵七百名副都統鶴山帶領於

二十二日起程九月初四日已抵十六臺臣領

右衛左翼兵五百名於九月初六日已抵十六
臺護軍叅領蘇尼勒圖帶領右衛右翼兵五百
名初六日亦抵十五臺現在臣等所領三隊兵
丁即日兼程前赴烏里雅蘇台奏入報

聞

戊寅

諭安插伯什阿噶什等屬人事宜

上諭軍機大臣曰舒明奏稱伯什阿噶什烏巴什等

屬人請暫在哈達青吉勒地方居住等語前命安
插伯什阿噶什屬人等於額克阿喇勒地方今自
哈達青吉勒移至彼處程途既遠且時屆嚴寒行
走稍艱著即照舒明等所奏辦理其達什達瓦屬
人亦照所請在鄂爾昆地方游牧並傳諭富森留
彼照看一二年後再行回京

已卯

命獎賞台吉達瑪林等

上諭軍機大臣曰管理塔楚等五臺之車臣汗部落
台吉達瑪林當臺站驚擾之際能約束該管臺站
人等復令伊子塔木楚克帶兵曉諭無一人擅離
臺站甚屬可嘉著查明達瑪林係何等台吉奏聞
加恩其扎克臺喀爾喀章京旺扎爾亦著加恩賞
戴孔雀翎

辛巳

命派副都統濟福侍衛德爾森保索倫總管伊柱赴

車臣汗部落查拏搶掠商人匪賊

命復格勒克巴木丕勒公爵

上諭軍機大臣曰格勒克巴木丕勒前因辦理馬匹
遲延革去公爵發往伊犁効力自至伊犁後行走
甚屬奮勉遇賊拘留今始得出情形可憫著加恩
仍復公爵賞戴雙眼翎伊部落現有賊人搶掠商
人之事著即回至游牧會同濟福等查辦

壬午

命分別獎賞協理台吉阿喇卜坦等

上諭軍機大臣曰納穆扎爾奏稱喀爾喀等間有搶奪鄂爾昆商人之事協理台吉阿喇卜坦即派兵彈壓頗著勞績等語著查明阿喇卜坦係何等台吉奏聞加恩扎木叅多爾濟遵伊兄將軍成衮扎布之諭行走奮勉並著加恩賞給公品級以示鼓勵

命晉封貝勒達什丕勒郡王品級

上諭軍機大臣曰達什丕勒原係扎薩克台吉經朕
節次加恩授為貝勒品級昨聞擅回游牧正欲加
恩曲宥觀其後效伊即派所屬兵丁馬匹接設臺
站其從前擅回游牧不過誤聽浮言不足深責仍
著加恩晉封郡王品級現在臺站俱係新設非加
意巡查恐有遲悞著交達什丕勒會同總管達松
阿等悉心辦理

癸未

諭定邊左副將軍成衮扎布酌量調遣察哈爾兵丁
上諭軍機大臣曰成衮扎布奏稱喀爾喀各部落調
遣兵丁尅期未能齊集所有內地派往兵丁三千
名現在行文催取等語綏遠城兵丁前據富昌等
奏聞將抵軍營此時應已齊赴烏里雅蘇台惟察
哈爾兵丁一千名已經降旨停派著傳諭成衮扎
布酌量應否仍遣此項兵丁再行調遣並令瑚圖
靈阿等仍赴察哈爾揀選豫備聽候成衮扎布行

文到日即速前往軍營聽候調遣如不需用仍行
停止昨降旨令瑚圖靈阿赴車臣汗部落會同濟
福等查拏搶掠商人匪賊此時毋庸前往若成衮
扎布行知停派察哈爾兵丁瑚圖靈阿即赴車臣
汗部落會同查辦

甲申

諭副都統巴蘭泰傳

諭輝特台吉等約束屬人及輪班入

觀事宜

上諭軍機大臣曰前巴蘭泰照看都爾伯特人等尚屬妥協今復令其承辦遷移輝特人等事務宜加意經理都爾伯特人等間有一二偷竊牲畜之人俱經查出治罪著曉諭輝特台吉等嚴加約束倘有似此匪竊者即當按律治罪斷不得姑息了事庶可懲戒將來至都爾伯特王公台吉等已令三楚爾漢分作三班每年輪值一班入覲今輝特

人等止一楚爾漢若令頻年入覲殊非所以示體
卹著將輝特人等亦照都爾伯特之例分作三班
每年輪班入覲

戊子

恩免甘肅省歷年民欠錢糧

上諭大學士曰前因甘省地方承辦軍需降旨將甘
涼肅三府州屬民屯及番民等本年應徵各項錢
糧米豆草束一概蠲免其餘各府州縣雖地方有

衝僻之不同承辦有多寡之或異朕念該處小民
趨事赴公均屬勤苦著加恩將甘省十三府州廳
屬各州屬衛乾隆十一年至十五年民欠地丁錢
糧草束概予蠲免十六年至二十年民欠未完正
借錢糧著自丁丑年為始分作五年帶徵其安西
五衛近接軍營臯蘭一縣地居省會出力尤多著
將本年應徵各項錢糧俱照甘涼肅三府州之例
一體蠲免其寧夏平涼鞏昌蘭州等府屬十七州

縣本年應徵各項錢糧亦著蠲免十分之三以紓民力再甘肅通省尚有乾隆元年至九年蠲剩未完及十年至十五年民欠籽種口糧牛本等項銀糧非因災出借為定例所不應免但該省承辦軍需民力實堪軫念著一併加恩蠲免該督撫等其董率屬員實心經理務使膏澤下逮以副朕格外恩施優卹邊民之至意

庚寅

命授都爾伯特親王伯什阿噶什等為正副盟長

上諭軍機大臣曰都爾伯特親王伯什阿噶什著授
為盟長貝子烏巴什著授為副盟長所有伊等屬
人應編立旗分之處著照例辦理

辛卯

上自木蘭迴

鑿駐蹕

避暑山莊都爾伯特親王伯什阿噶什貝子烏巴

什等行

朝見禮

恩賜筵宴如例

恩賞都爾伯特親王伯什阿噶什等銀兩牲隻有差
上諭軍機大臣曰親王伯什阿噶什著賞銀二千兩
貝子烏巴什賞銀六百兩並賞伯什阿噶什馬五
百匹牛一百頭羊二千隻烏巴什馬二百匹牛五
十頭羊一千隻俾伊等生息資用管旗章京每員

著賞銀一百兩副管旗章京每員八十兩宰桑每員六十兩其台吉達木巴都噶爾布魯特扣肯等遣來之宰桑等每員俱著賞銀四十兩

命加恩臺站兵丁

上諭軍機大臣曰據蘇巴什里奏稱前歲添派內扎薩克喀爾喀烏拉齊等已在臺差委兩年妻子俱在臺站所給錢糧請照喀喇沁之例支給等語此等烏拉齊與喀喇沁一體當差著加恩照喀喇沁

之例加倍支給其二十一臺至二十八臺兵丁二百三十六戶牲隻間被搶掠著加恩每戶賞米二石以示體卹

壬辰

命侍衛特音保等赴伊犁差遣

軍機大臣奏言據定邊右副將軍兆惠奏請揀選索倫達呼里侍衛拜唐阿等十員赴伊犁差遣臣等揀選侍衛特音保等十二員帶領引

見恭請

欽定十員前往差委得

旨特音保達桑阿達克塔納愛布薩塞新保南田保
滿珠噶爾瑪巴沁保扎慎保俱著遣往伊犁交與
兆惠差遣委用

閏九月丙申朔

命賞給厄魯特坐臺兵丁口糧

上諭軍機大臣曰據兆惠等奏稱三格莽阿納等接

設阿布喇勒等處各臺站所有兵丁口糧即令各
鄂拓克運送等語朕念伊等數年來從事軍營甚
屬勞瘁現在生計不能充裕此項口糧應動官項
給發如伊等業已運送即賞給價值以示優卹

戊戌

申諭定邊左副將軍成袞扎布擒拏青滾雜卜

上諭軍機大臣曰據侍衛端濟布奏稱青滾雜卜遣
人至哲卜尊丹巴胡土克圖處懇求代奏寬宥並

請移至烏梁海哈喇達爾汗地方居住等語青滾
雜卜之罪萬無可逭若少可寬宥朕自當格外施
恩即如策登扎布雖聽信青滾雜卜之言擅回游
牧然尚無背叛情形仍派伊所屬兵丁接臺坐卡
自可無庸深責至策卜登顯與逆賊同謀然其人
本屬糊塗且係喀爾喀舊人不忍即治其罪已令
將軍成衮扎布詳加體察再行辦理青滾雜卜種
種不法非此二人之比是以降旨擒拏治罪著傳

諭哲卜尊丹巴胡土克圖不得聽其懇求代為陳
奏此而可宥國法安在並著傳諭成衮扎布速遵
節次所降諭旨擒拏青滾雜卜治罪以昭國法毋
致脫逃

庚子

諭副都統舒赫德停解軍營口糧各事宜

上諭軍機大臣曰舒赫德奏稱接唐喀祿咨額爾齊
斯一帶臺站應派兵巡查伊即帶兵護送運往哈

達哈軍營口糧牲畜前赴額爾齊斯等語舒赫德
辦理尚合機宜但現在額爾齊斯等處間有烏梁
海肆出搶掠運送牲畜沿途應加意防護前已降
旨令達爾黨阿哈達哈等暫行撤兵此項牲畜毋
庸急行送往不若在中途牧放派兵防護俟伊等
撤兵回時即行接濟原可無悞舒赫德前遣三都
卜帶兵巡查臺站至努赫圖嶺地方遇烏梁海等
賊人斬獲甚衆著即令三都卜奮勇前進往迎達

爾黨阿哈達哈等將節次所降撤兵諭旨齋往宣
諭令伊等即遵旨辦理舒赫德仍領兵陸續繼往
巡查一路臺站中途遇烏梁海等盡行勦滅毋使
漏網再所奏喀爾喀協理台吉丕勒多爾濟在噶
老圖地方管理臺站甚屬奮勉等語著查明丕勒
多爾濟係何等台吉奏聞加恩

癸卯

諭安設西路臺站各事宜

上諭軍機大臣曰據雅爾哈善等轉奏貝勒扎那噶爾布扎哈沁宰桑鄂爾奇木濟各摺鄂爾奇木濟應付來往官兵口糧馬匹甚屬可嘉著加恩補授散秩大臣賞戴孔雀翎並賞銀一百兩扎那噶爾布奏稱伊所屬坐臺人等並未支領口糧等語從前扎拉豐阿等奏稱厄魯特坐臺兵丁每月俱給與錢糧或因扎那噶爾布情願自備資斧未經給與著查明一體賞給並著永貴通查各路臺站將

來撤兵之後應派兵丁若干酌量安設其坐臺兵
丁亦應照北路之例令兵丁等帶領戶口同居並
賞給馬匹牲隻俾資生計會同兆惠及各宰桑等
詳議奏聞喀喇沁臺站叅領第魯巴熟悉臺務著
即前往會同永貴查辦此等皆係新設臺站應嚴
行通飭毋得有悞差委及滋生事端之處永貴等
務宜妥協辦理再據鄂爾奇木濟奏稱庫勒特三
百戶自伊犁前來戕害伊游牧屬人等語此項庫

勒特等詢之在京厄魯特等稱係達瓦齊所屬應將此項人歸於二十一昂吉內管轄何得任其肆行生事並著兆惠查明辦理

命授塔木楚克扎卜為貝勒

上諭軍機大臣曰貝子羅卜藏策楞上年因伊犁擾亂受傷身故甚屬可憫伊子塔木楚克扎卜近復派兵接續臺站行走奮勉著加恩封塔木楚克扎卜為貝勒以示優眷

定邊左副將軍成衮扎布疏奏領兵擒拏青滾
雜卜各事宜

成衮扎布等奏言臣於九月二十六日抵烏里
雅蘇台軍營查閱軍營兵丁約一千有餘綏遠
城兵二千名計閏九月十五以前陸續可到統
計兵力已足擒賊臣等即行帶領前往仍一面
曉諭附近逆賊青滾雜卜之扎薩克等并和托
輝特所屬人等令其協同擒獻又聞青滾雜卜

將察達克赤倫烏梁海人等移入伊附近地方
居住必有私相煽惑之事即移咨阿蘭泰遣人
傳赤倫及察達克子弟等明白開導諭以利害
毋墮賊計再貝子彭楚克公丹拜等所轄烏梁
海亦與青滾雜卜烏梁海連界居住臣復遣親
信人往諭剪其羽翼俾此賊窮蹙無歸則釜魚
穴鼠自可不日戍擒奏入報

聞

定邊左副將軍成衮扎布等疏奏臺站人員分別加恩治罪事宜

成衮扎布等奏言臣等遵奉

諭旨查管臺台吉扎木揚因驍騎校策登伊什等不遵約束私回游牧伊即力行阻止仍與章京多爾濟辦理臺務扎木揚係三等台吉應請

旨陞為二等台吉章京多爾濟量賞緞疋其策登伊什等十九人擅自逃散并將駝馬私行帶回甚

屬不法應交與該旗即行治罪其臺上駝馬飭
令該扎薩克照數退出賠補奏入報

聞

甲辰

諭和托輝特貝勒旺布多爾濟

上諭旺布多爾濟曰青滾雜卜負恩背叛種種不法
已屢次降旨曉諭旺布多爾濟必無與賊同謀之
事朕可深信昨據貝勒策登扎卜屬人告稱逆賊

青滾雜卜令遷爾游牧於附近地方爾雖聽從並
非真心附賊等語今大兵將抵和托輝特部落已
加恩命爾承襲貝勒如能擒獻逆賊協同大兵擒
拏自當加以重賞否則即帶領所屬及各台吉等
投至軍營既可永受朕恩且不隨爾祖博貝舊勳
即青滾雜卜屬人誤聽指使今能棄賊來歸亦一
概免其治罪倘迷而不悟大兵所至必與青滾雜
卜一體擒拏治罪爾其熟思深慮善自為計毋貽

後悔

諭定邊左副將軍成袞扎布派兵協擒青滾雜卜事

宜

上諭軍機大臣曰據成袞扎布等奏稱汗哈屯烏梁海等聞與賊青滾雜卜連合已遣員往諭策凌策凌烏巴什等領兵就近勦滅烏梁海等語前經降旨令舒赫德曉諭策凌等派兵勦滅烏梁海附賊人等成袞扎布所奏適與朕旨符合著再傳諭舒

赫德遵照前旨辦理再大兵往擒青滾雜卜應飭
知附近青滾雜卜游牧各扎薩克派兵堵截以防
逆賊逃竄之路方為妥協扎薩克圖汗巴勒達爾
等游牧與和托輝特毗連成衮扎布應豫行知會
該處令其協力堵禦此外倘有應行傳知各部落
派兵協擒之處著成衮扎布一面辦理一面奏聞
定西路新設臺站供應馬匹口糧章程

上諭軍機大臣曰西路各處坐臺之厄魯特等皆係

新降人衆生計未能充裕如往來馳驛概行取給馬匹口糧伊等力難供應嗣後除奉旨馳驛者仍照常由臺站辦給其自各處往來差委人員俱著於各原地方辦給馬匹口糧不得沿途支取著為令

乙巳

諭定邊左副將軍成袞扎布速擒青滾雜卜

上諭軍機大臣曰據成袞扎布等奏附近青滾雜卜

游牧之台吉等俱遣人告知逆賊煽惑情形現候
大兵前進等語看此情形大兵即宜速進方合機
宜著成衮扎布即揀選索倫兵一千名同納穆扎
爾帶領前進其餘兵丁著納延泰富昌陸續進發
務宜聲勢聯絡互相策應俾附近各台吉等早得
歸附不受逆賊脅從擒拏自屬更易至策登扎卜
從前果否與賊同謀尚無實據今據奏稱實係附
和逆賊甚屬可惡伊尚遣人告知普慶等自言其

並未附賊飾詞狡詐罪不容誅著即照成衮扎布等所奏俟進兵時一併擒拏治罪其現在遣人前來之各台吉等著成衮扎布等登記俟事竣酌量加恩至扎薩克公多岳特多爾濟既無子嗣所有屬人現在需人約束伊弟密丕木多爾濟並未附和逆賊著將多岳特多爾濟公爵加恩即令密丕木多爾濟承襲

命獎賞扎薩克台吉阿喇卜坦等

上諭軍機大臣曰成袞扎布等奏稱管理塔米爾糧
餉等事務之扎薩克台吉阿喇卜坦等行走奮勉
等語台吉阿喇卜坦布達扎卜俱著賞戴孔雀翎
其已經賞翎之協理台吉旺舒克及其餘効力台
吉官員等俱著賞給緞疋兵丁等著賞給錢糧一
月以示獎勵

平定準噶爾方略正編卷三十一